

आकाशवाणी

खबरां-

- प्रधानमंत्री नरेंद्र मोदी होर अज्ज नमीं दिल्ली च राष्ट्री गीत "वंदे मातरम" दे 150 ब'रे पूरे होने दे उपलक्ष्य च इक ब'रे तगर चलने आहले स्मरण कार्यक्रम दा उद्घाटन करडन।
- बिहार च असैम्बली चुनाएं दे कल पैहले गेड दे मतदान दरान 64 इशारिया 6-6 फीसद मतदाताएं वोट पाने दे अपने हक्के दा इस्तेमाल कीता।
- बिहार च असैम्बली चुनां दे दुए गेड लेई प्रचार तेज होई गेआ ऐ। एनडीए ते महागठबंधन दे नेता, राज्य च लगातार रैलियां-जलसे करा'रदे ना।
- सूडान च अह-सैनिक रैपिड सपोर्ट फोर्स- आरएसएफ सूडानी सशस्त्र बलें खलाफ द'उं ब'रें शा मते समें थमां चलै करदे संघर्श दे दरम्यान अमरीका दे प्रस्तां पर मनुक्खी बिनाहू उप्पर युद्धविराम लेई सैह्यत होई गेआ ऐ।
- भारती हॉकी दे गौरवशाली 100 ब'रें दे उपलक्ष्य च अज्जै थमां राष्ट्रव्यापी समारोह शुरू होआ'रदे ना।

<><><><><><>

PM-Vande Marathon

प्रधानमंत्री नरेंद्र मोदी होर अज्ज नमीं दिल्ली च राष्ट्री गीत 'वंदे मातरम' दे 150 ब'रे पूरे होने दे सरबंघै च इक ब'रे तगर चलने आहले कार्यक्रम दा उद्घाटन करडन। इस मौके पर ओहू इक डाक टिकट ते सिक्का बी जारी करडन। सोशल मीडिया दी इक पोस्ट च प्रधानमंत्री मोदी होरें आखेआ जे एहू दिन हर भारती आस्तै इक महत्वपूर्ण मौका ऐ।

उनें वंदे मातरम गी इक प्रेरक आह्वान दस्सेआ जिन्नै पीढ़िं गी प्रेरित कीता ऐ ते पूरे मुल्बै च देशभक्ति दी भावना गी पैदा कीता। वंदे मातरम दे 150 बरे पूरे होने दा जिक्र प्रधानमंत्री होरें अपने पिछले महीने प्रसारित 'मन की बात' कार्यक्रम च बी कीता ह। इस कार्यक्रम च सार्वजनिक थाहरें पर वंदे मातरम दे पूर्ण संस्करण दा सामुहिक गायन होगा। वंदे मातरम दी रचना बंकिमचंद्र चटर्जी होरें अक्षय नौमी 7 नवंबर 1875 गी कीती ही।

<><><><><><>

Bihar-Polling

कल बिहार विधानसभा दे चुनाएं दे पैहले चरण च 64.66 फीसद रिकार्ड मतदान दर्ज कीता गेआ। ई.वी.एम च कुल 1 जहार 314 मेदवारें दी किस्मत कैद होई गई। इस चरण च प्रमुख नेताएं च बीजेपी दे नेता सम्राट चौधरी ते विजय कुमार सिन्हा, नितिश कुमार हुंदे मंत्रीमंडल दे 16 मंत्री ते आर.जे.डी दे नेता ते महागठबंधन दे मुखमंत्री मेदवार तेजस्वी प्रसाद यादव शामिल ना। चुनांऽ आयोग दे अंतरराष्ट्री चुनांऽ विजिटर प्रोग्राम तैहत 6 मुल्खें दे प्रतिनिधियें पटना, मुजफरपुर, वैशाली ते नालंदा च मतदान आहले इलाकें दा दौरा लाया।

<><><><><><>

Campaigning Bihar

बिहार विधानसभा चुनांऽ दे दुए ते अखीरले चरण लेई चुनांऽ प्रचार चरम पर पुज्जी गेआ ऐ। एनडीए ते महागठबंधन दे वरिष्ठ नेताएं दे अलावा दुइएं पार्टिं दे नेताएं बी चुनांऽ प्रचार च पूरी ताकत लाई दिती ऐ। सीमांचल, मगध, शाहाबाद ते चंपारण खित्तें दे जिलें च बक्ख-बक्ख पार्टिं दे स्टार प्रचारक ते वरिष्ठ नेता जबरदस्त ढंगै'नै चुनांऽ प्रचार करा'रदे ना।

विधानसभा चुनांऽ दे दुए ते अखीरले चरण च 20एं जिलें दे 122 विधानसभा हलकें च 11 नवंबर गी वोट पाए जाइना। वोटें दी गिनतरी दा कम्म 14 नवंबर गी कीता जाह्ग।

<><><><><><>

Jitendra-Luxembourg

भारत ते लक्समबर्ग नै विज्ञान, तकनीक ते अंतरिक्ष अन्वेषण गी होर मजबूत करने दी प्रतिबद्धता गी परतियै दोहाया। नमी दिल्ली च इक बैठक च विज्ञान ते प्रौद्योगिकी मंत्री डॉ. जितेंद्र सिंह ते लक्समबर्ग दी ग्रैंड दुची दे राजदूत क्रिश्चिन बीवर होरें यूरोपीय बजार च भारती स्पेस स्टार्ट अप्स गी बढावा देने लेई होर रस्ते दी तलाश उप्पर गल्लबात कीती। विज्ञान ते प्रौद्योगिकी मंत्रालय नै आखेआ ऐ जे इस बैठक च नवाचार आहले क्षेत्र? जियां साइबर सुरक्षा, क्वांटम तकनीकें ते आर्टिफिशल इंटेलीजेंस च सांझी पैहलकदमियें गी अग्रे बधाने उप्पर ध्यान दित्ता गेआ ऐ। डॉ. सिंह होरें भारत दे विज्ञान ते नवाचार च इक वैश्विक नेता दे तौरा पर उभरने उप्पर जोर भरेआ।

<><><><><><>

MEA-Thailand

बैंकाक च भारत दे दूतावास ते चियांग माई च .. नै थाईलैंड दे .. थमां भारत च 26 महिलाएं सने 270 भारती नागरिकें गी वापस आहनने च मदद कीती ऐ। एह कार्रवाई थाईलैंड सरकार दे समर्थन कन्नै कीती गेई ऐ ते इस च भारती वायु सेना दी 2 खास डोआरियां शामिल ना। इनें लोकें गी थाईलैंड दे अधिकारियें गैर कनूनी तौरा पर मुल्ख च दाखल होने मगरा इम्मीग्रेशन कनून दे उल्लंघन करने दे मामले च हिरासत च लैता हा।

<><><><><><>

SEBI Online Investments

भारती प्रतिभूति ते विनिमय बोर्ड-सेबी ने शेयर बजारें थमां आईपीओ आहनने आहले लौहके ते दरम्याने दर्जे दे उद्यमें-एसएमई दा भौतिक निरीक्षण करने ते बवसायें दी तसदीक करने लेई आखेआ ऐ। मुंबई च 12में एसबीआई बैंकिंग ते अर्थशास्त्र सम्मेलन 2025 गी संबोधित करदे होई कल सेबी दे अध्यक्ष तुहिन कांत पांडे होरें आखेआ जे लौहके बवसायें दे आईपीओ दी समीक्षा लेई बैंकें ते लौहके ते दरम्याने दर्जे दे उद्यमें सरबन्धी संघें कन्नै सलाह-सूत्तर जारी ऐ।

लौहकी ते दरम्याने आकार दिएं फर्में, खासकरियै मर्चेट बैंकरें आसेआ आईपीओ च किश त्रुटियें गी दिक्खदे होई, सेबी ने आईपीओ आह्नेने दे नियमें गी सख्त करी दिता ऐ। मर्चेट बैंकरें गी आखेआ गेआ ऐ जे ओह मर्चेट बैंकिंग गतिविधियें कन्नै सिद्धे तौर पर नेई जुडे दे बवसायें गी बक्खरे-बक्खरे मार्के आह्ले नाएं तैह्त्त बक्ख-बक्ख इदारे च बंडुी देन।

<><><><><><>

Sudan Ceasefire

सूडान च अद्-सैनिक रैपिड सपोर्ट फोर्स - आरएसएफ सूडानी सशस्त्र बलें खलाफ द'उं ब'रें शा मते समें थमां चलै करदे संघर्श दे दरम्यान अमरीका दे प्रस्ताऽ पर मनुक्खी बिनाह् उप्पर युद्धविराम लेई सैह्त्त होई गेआ ऐ। आरएसएफ ने दारफुर खेत्तर दे अल-फशर शैह्त्ता पर कब्जा करने दे तुरत मगरा इस फैसले दा ऐलान कीता। युद्धविराम दा एह् प्रस्ताऽ अमरीका दी अगुवाई आह्ले क्राड मध्यस्थ समूह ने दिता हा जेह्दे च सऊदी अरब, मिस्त्र ते संयुक्त अरब अमीरात शामिल ना। आरएसएफ ने आखेआ ऐ जे उन्ने 18एं म्हीने दी घेराबंदी दे परैन्त, बसनीकें गी फौरी सहायता पुजाने लेई युद्धविराम गी ो स्वीकार कीता ऐ। सूडान दी फौजी-नेतृत्व आह्ली सरकारै हुनै धोह्डी इस प्रस्ताऽ पर कोई प्रतिक्रिया नेई दिती ऐ। अप्रैल 2023 च शुरू होए दे गृह युद्ध च केई बारी युद्धविराम दे जतन होए ना।

सामूहिक हत्तेआएं लेई अंतर्राष्ट्री सतह उप्पर निंदेआ दा सामना करा'रदे आरएसएफ दा आखना ऐ जे ओह् स्थायी शांति दे मकसद कन्नै गल्लबात लेई तैयार ऐ।

<><><><><><>

Hockey-100 Years

भारती हॉकी दे 100 गौरवशाली ब'रे मनाने लेई कल इक देशव्यापी जश्न मनाया गेआ। शताब्दी समारोह दे हिस्से दे तौरा पर 550 जिलें च 1400 शा मते मैच होडन। इस रदान हॉकी दे महारथियें गी इस खेड्डु च उन्दे योगदान लेई सम्मानित कीता जाह्ग।

भारती हॉकी गी अग्गे लेई जाने आहले खडारियें गी चेता करदे होई इक श्रद्धांजलि दे तौरा पर इक अधिकारिक स्मारक खंड 'भारती हॉकी दे 100 बरे' बी जारी कीता जाग। भारती हॉकी दी 100 बरे दी गौरवशाली यात्रा गी दस्सने लेई मेजर ध्यानचंद नेशनल स्टेडियम च इक बड्डी फोटो एग्जीबीशन बी लाई जाग।



Hockey Jr World Cup

मर्दे दे एफ.आई.एच. हॉकी जूनियर विश्व कप 2025 दी ट्रॉफी गी भारत दे बक्ख-बक्ख हिस्सें च लेते जाने दा रोमांच, बरोबर जारी ऐ ते हुन औंदी 11 नवम्बर गी एह ट्रॉफी, जम्मू-कश्मीर आवा करदी ऐ। इस ट्रॉफी गी मुख्य दे बक्ख-बक्ख हिस्सें च लेने दी शुरुआत जंदी 7 नवम्बर गी नमीं दिल्ली थमां होई ही ते एहदी एह जात्तरा 26 नवम्बर 2025 गी थिरूवनन्थपुरम पुज्जियै संपन्न होई जाह्ग। इस जात्तरा दा मकसद, आलमी सतह दी इस प्रतियोगिता गी लेइयै मुख्य भरै दे बसनीके अंदर आकर्षण ते जोश पैदा करना ऐ।

मर्दे दे एफ.आई.एच. हॉकी जूनियर विश्व कप 2025 दे 14में संस्करण दा आयोजन तमिलनाडु दे मदुरै ते चेन्नै च मेयर राधाकृष्णन हॉकी स्टेडियम च औंदी 28 नवम्बर थमां लेइयै 10 दिसम्बर 2025 तगर कीता जाह्ग। नेहा पैहली बारी होआ करदा ऐ जे इस प्रतियोगिता च ऐगती 24 टीमां, खिताब लेई आपूं-चै मुकाबले खेड्डन।

